



# UPC TAVAGNÀ: CUANT CHE IL BALON FEMININ AL FEVELE ZÂL E BLU

Fra lis tantis ecelencis che o vin in Friül dal sigür une di chestis e je la squadre di balon feminine di serie A de UPC Tavagnà che, ancje tal Campionât di chest an, e je daür a fâsi onôr puartant i colôrs de nestre bandiere zale e blu in dute Italie.

La squadre furlane, che di sedis stagjions in ca e zuie te massime serie dal balon feminin, tai ultins agns e je rivade a cualificâsi te Women's Champions League e e à conquistât par dôs voltis la Coppa Italia diventant un pont di riferiment par dut il sport 'in rose' de region. A chest pont dal campionât il Tavagnà al è cuart in classifiche (cuntun recupar cu la Fiorentina ancjemò di fâ) cun 19 ponts - 5 ponts in plui rispjet a l'an passât - e al pues svantâ di jessi il secont atac dal campionât cun 29 goi fats graciis ancje ae magjiche scozese Lana Clelland che

e je prime te classifiche dai canonirs cun 12 rêts.

Alenadis dal Mister Amedeo Cassia, il grup fuart de squadre al è chel dal an passât cul inseriment di cualchi zuiadore dal vivâr che insiem a stan dant risultâts e sodisfazions inspietadis no dome pai ponts in classifiche ma ancje pe determinazion e pe grinte metudis sul cjamp des fantatis.

La societât, voidade dal president Roberto Moroso, imprendidôr furlan, e pues fâ stât suntuun vivâr di passe sesante zovinis che cun passion e grande volontât a rivin di dut il Friül par alenâsi e par zuiâ tai cjamps di Tavagnà.

In efietis il balon feminin al vif dinamichis dal dut diferentis dal balon maschil che pôc a àn a ce fâ cu la bravure atletiche, l'impegno e la passion des zuiadoras, dai alenadôrs e dirigjents ma pluitost a

son colegadis a aspiets leâts al marcjât, aes sponsorizacions, ai dirits televisifs e a une visibilitât ancje di stampe che dispès e gjave spazi no dome al balon feminin ma ancje a altris specialitâts sportivis. Rispjet a altris paîs europeans in Italie il balon feminin al è ancjemò considerât un sport par pôcs apasionâts e ancje in Friül la realtât dal UPC Tavagnà no je cussì cognossude come che e meretarès.



Par fâle cognossi di plui e par fidelizâ ancjemò gnûfs tifôs ae squadre, che pal 80% e je fate di zuiadoras furlanis, Domenico Bonanni l'aministradôr delegât di Megavision, sponsor uficiâl de UPC Tavagnà al à decidût di doprâ ancje la lenghe furlane par realizâ i videos promozionâi de squadre. "Il gno obietif - al marche Bonanni - al è chel di aumentâ la visibilitât e la cognossince de squadre metint dongje cheste ecelence locâl - uniche formazion di serie A sul teritori, furlane no dome tai colôrs ma ancje te composition de squadre e te espression de dirigjence - ae specialitât ancje linguistiche dal teritori. Al è une vore interessant ancje par me che furlan no soi, scoltâ lis fantatis che si contin te lôr lenghe e che a invidin i furlans a cognossi il balon feminin e a partecipâ aes partidis tal stadi di Tavagnà. Dopo tancj agns di vite in Friül o ai capit che pai furlans cuatri robis no si puedin tocjâ: l'Udin, i alpîns, lis Frecis tricolôrs, ma, soredut, la lenghe furlane; e ricognossi che la identitât di un teritori e à un leam une vore strent ancje cul sport, mi è someât un pinsîr dal dut naturâl. Cun di plui,



cuant che o zuin ator pe Italie, o puartin fûr il non dal Friül e si presentin te nestre unicitât ancje linguistiche. Elements che, svilupâts tal timp cun altris azions colegadis ai spot realizâts, a podressin jessi interessants ancje pal marketing teritoriâl".

Par viodi i spot, un dut par furlan e altris in lenghe miste (ancje scozese), si pues lâ sul canâl Youtube de UPC Tavagnà. Invezit par seguî e par sostignî la squadre l'apontament al è, pes partidis in cjase, la sabide aes 14.30 tal cjamp sportîf di vie Tolmezzo a Tavagnà, e informazions inzornadis si puedin ancje cjatâ tal sit de societât [www.upctavagnacco.it](http://www.upctavagnacco.it) e sui social (Facebook, Twitter e Instagram). Cun di plui ogni setemane su Udinese Tv il miercus aes 18.15 e su Telefriuli te stesse zornade aes 18.30 si pues seguî un spazi dedicât ae squadre feminine furlane. Al Tavagnà al è dedicât ancje un hastag: **#noivediAMOGialloblu**. Cui puedial dî in Friül di no viodi e di no Amâ il zâl e blu?

E alore sostignin ducj unîts i colôrs blancneri e zâlblu, dôs squadra, il stes cûr. Furlan. Fuarce fantatis e bon campionât!

Priscilla De Agostini

Par informazions:  
[www.arlef.it](http://www.arlef.it)  
[arlef@regione.fvg.it](mailto:arlef@regione.fvg.it) - tel. 0432/555812

Par cure de:

